

## Morning Dogri (NSD) National News Bulletin 31-03-2024

आकाशवाणी

- भारतीय जनता पार्टी दे वरिष्ठ नेता ते प्रधानमंत्री नरेन्द्र मोदी होर मेरठ च अज्ज इक जनसभा गी संबोधत करियै उत्तर प्रदेश च चुनां अभियान दी शुरूआत करगंन।
- अरुणाचल प्रदेश च नामांकन वापस लैने दी कल खीरी तरीक मगरा बीजेपी दे 10 एमएलए निर्वारोध चुनी लैते गे। उत्थें 19 अप्रैल गी विधानसभा दी 60 सीटें ते लोकसभा दी 2 सीटें लेई मतदान होना ऐ।
- प्रवर्तन निदेशालय नै दिल्ली दे ट्रांसपोर्ट मंत्री ते आम आदमी पार्टी दे नेता कैलाश गीलोत हुंदे थमां 5 घेंटे पुच्छ-गिच्छ कीती।
- दिल्ली पुलिस नै न्यूज क्लिक पोर्टल दे संस्थापक खिलाफ गैर कनूनी गतिविधि कनून तैहत आरोप पत्र दायर कीता ऐ।
- आईपीएल क्रिकेट दे 11में मैच च कल लखनऊ सुपर जायंटस नै पंजाब किंग्स गी 21एं रंजें कन्नै हराई दित्ता।

<><><><><><>

### **PM-Merath**

भारतीय जनता पार्टी दे वरिष्ठ नेता ते प्रधानमंत्री नरेन्द्र मोदी होर अज्ज उत्तर प्रदेश च चुनां अभियान दा शुभारंभ करगंन। ओह मेरठ च जनसभा गी संबोधत करगंन। बीजेपी नै टीवी सीरियल रामायण थमां प्रसिद्ध होए दे अरुण गोविल होरें गी मेरठ लोकसभा हल्के थमां मेदवार बनाया ऐ। उत्तर प्रदेश दे मुखमंत्री योगी आदित्यनाथ, राष्ट्रीय लोक दल दे प्रमुख जयंत चौधरी ते बीजेपी दे दुए नेता इस मौके पर मजूद होंगन। उत्तर प्रदेश च 7एं गेड़ें च मतदान होना ऐ। भारतीय जनता पार्टी दे नेतृत्व आले राष्ट्रीय जनतांत्रिक गठबंधन एनडीए नै परतियै केन्द्र च सत्ता च औने दा विश्वास जताया ऐ ते एहदे लेई उत्तर प्रदेश सब्बनें शा बद्ध 80 संसदीय सीटें कन्नै महत्वपूर्ण साबत होग।

<><><><><><>

## Arunachal BJP

अरुणाचल प्रदेश च कल नामांकन वापस लैने दी खीरी तरीक दे बाद भारती जनता पार्टी दे 10 विधायकें गी निर्विरोध चुनी लैता ऐ। अरुणाचल प्रदेश च विधानसभा दिएं 60 ते लोकसभा दिएं 2 सीटें लेई इक्कै चरण च 19 अप्रैल गी मतदान होग।



## President Bharat Ratan

राष्ट्रपति द्रौपदी मुर्मू होर अज्ज साबका उप-प्रधानमंत्री ते बीजेपी दे वरिष्ठ नेता लाल कृष्ण आडवाणी होरें गी देश दे सब्बने शा उच्चे नागरिक सम्मान भारत रत्न कन्नै सम्मानत करगंन। कल राष्ट्रपति भवन च इक समारोह च साबका प्रधानमंत्रिण पी.वी.नरसिम्हा राव ते चौधरी चरण सिंह ते 2 बारी बिहार दे मुख्यमंत्री रेह दे कर्पूरी ठाकुर होरें गी मरणोपरांत भारत रत्न कन्नै सम्मानत कीता गेआ। उंदे सरबंधिण एह सम्मान ग्रहण कीते। अलंकरण समारोह च उपराष्ट्रपति जगदीप धनखड़, प्रधानमंत्री नरेन्द्र मोदी, केन्द्री गृहमंत्री अमित शाह, कांग्रेस प्रधान मल्लिकार्जुन खड़गे, विदेश मंत्री डॉ. एस.जयशंकर, बिहार दे मुख्यमंत्री नीतिश कुमार ते दुए गणमान्य व्यक्ति मजूद हे। भारत रत्न देश दा सब्बने शा उच्चा नागरिक अलंकरण ऐ जेहड़ा मनुखी जतनें दे कुसै बी क्षेत्र च बड़ी बदिया सेवा जां कम्में आसतै प्रदान कीता जंदा ऐ।



## ED Kailash

माली नियम-कायदे लागू करोआने सरबंधी निदेशालय ईडी नै दिल्ली दे ट्रांसपोर्ट मंत्री ते आम आदमी पार्टी दे नेता कैलाश गहलोत थमां 5 घंटे तगर पुच्छ-गिच्छ कीती ऐ। दिल्ली आबकारी नीति घोटाले कन्नै जुड़े दे मामले च एह पुच्छ-गिच्छ कीती गई। मगरा संवाददाताएं कन्नै गल्लबात च गहलोत होरें आक्खेआ जे उनें अजेंसी दे सब्बने सुआलें दे परते दित्ते न ते अग्गे बी जांच सैहयोग करगंन। उनें दस्सेआ जे एह प्रवर्तन निदेशालय दा दुआ समन हा की जे तकरीबन इक म्हीने पैहले दिल्ली विधानसभा दे बजट सत्र कारण ओह पैहले समन पर हाजर नेइं होई सके हे।

तोआई आम आदमी पार्टी दी नेता आतिशी होरें आक्खेआ ऐ जे पार्टी दे प्रमुख नेताएं दी गिरफ्तारी दिल्ली दी चुनी दी सरकार गी अस्थिर करने दी साजश ऐ।

<><><><><><>

## Delhi Police

दिल्ली पुलिस नै न्यूज क्लिक पोर्टल ते एह्दे संस्थापक प्रवीर पुरकायस्य हुंदे खलाफ गैर कनूनी गतिविधि रोकथाम कनून तैहत आरोप पत्र दायर कीता ऐ। इस न्यूज पोर्टल पर चीन दे पक्ष च प्रचार करने लेई धनराशि लैने दा आरोप ऐ। कोई 9 जहार पृष्ठें दे आरोप पत्र च जांच दरान बक्ख-बक्ख छापें च जब्त 480 इलैक्ट्रानिक उपकरणें सरबन्धी जानकारी ऐ। पुरकायस्य दे खलाफ कश्मीर ते अरुणाचल प्रदेश गी भारत दा हिस्सा नेई दस्सने दा बी आरोप ऐ। दिल्ली दी पटियाला हाउस अदालतै 16 अप्रैल गी इस मामले च अगली सुनवाई निर्धारित कीती ऐ। न्यूज क्लिक दे संस्थापक गी पिछले बरे 3 अक्टूबर गी कंपनी दे एच. आर.प्रमुख अमित चक्रवर्ती सनें गिरफ्तार कीता गेआ हा। इंदे पर अमरीका राएं चीन थमां गैर कनूनी ढंग कन्ने रकम लैने दा आरोप ऐ।

<><><><><><>

## ED

प्रवर्तन निदेशालय नै Alchemist ग्रुप कंपनिएं दी 29 करोड़ रुपे शा बद्ध मुल्लै दी संपत्ति गी आरजी तौर पर जब्त कीता ऐ। उनें संपत्तिएं च हवाई जहाज बीच किंग एयर सी-90ए, प्लैट ते हिमाचल प्रदेश ते मध्यप्रदेश च जमीनां शामिल न। ईडी मूजब Alchemist ग्रुप दा अध्यक्ष साबका राज्यसभा मेंबर ते ऑल इंडिया तृणमूल कांग्रेस दा कवरं द्वीप सिंह ऐ। ईडी नै जांच पड़ताल दी कारवाई सीबीआई ते लखनऊ ते कोलकाता पुलिस आस्सेआ दर्ज एफआईआर दे आधार पर शुरू कीती ऐ। जांच च पता लगा ऐ जे Alchemist ग्रुप नै निवेशकें ते पीड़ितें थमां इक जहार 8 सौ करोड़ दे फंडस, उनेंगी बाद्ध रिटर्नस, प्लैटें ते बिलास देने दे झूठे वायदे करियै किट्ठे कीते।

<><><><><><>

## BJP List

भारतीय जनता पार्टी नै लोकसभा चुनां आस्तै 11 मेदवारें दी इक होर सूचि जारी कीती ऐ। भारत दे अमरीका च साबका राजदूत तरणजीत सिंह संघु होर अमृतसर थमां बीजेपी दे मेदवार होंगन जदके हंस राज हंस होर फरीदकोट थमां मेदवार होंगन। प्रणीत कौर पटियाला लोकसभा सीट थमां रवनीत सिंह बिट्टू लुधियाना थमां ते सुशील कुमार रिंकू होर जालंधर सीट थमां पंजाब च बीजेपी दे मेदवार होंगन।



## J&K Rajasthan Diwas

जम्मू दे राजभवन च कल राजस्थान दिवस समारोह मनाया गेआ। आकाशवाणी दे जम्मू संवाददाता मूजब जम्मू कश्मीर च रौहने आले वरिष्ठ अधिकारी, विद्यार्थी ते राजस्थान दे निवासी इस समोराह च खास तौर पर सद्दे गेदे परौहने हे। इस मौके पर उपराज्यपाल मनोज सिन्हा होरें राजस्थान दे लोकें गी बधाई ते शुभकामनां दित्तियां।



## Bharat Zindabad

29 मार्च गी अरब सागर च इक अभियान दरान भारती नौसेना नै जेहड़े 23 पाकिस्तानी नागरिकें गी सोमालियाई समुंद्री डाकुएं शा बचाया हा, उनें भारत गी धन्नबाद दित्ता ते “भारत जिंदाबाद” दे नारे लाए। भारती नौसेना दी विशेष टीम नै इनें पाकिस्तानी नागरिकें गी थेआरें कन्नै लैस 9 समुंद्री डाकुएं शा बचाया हा। एह्दे परैंत इस पाकिस्तानी दल गी अरब सागर च भारत जिंदाबाद दे नारे लांदे दिक्खेआ गेआ।



## IPL

इंडियन प्रीमियर लीग क्रिकेट दे 11में मकाबले च कल लखनऊ सुपर जायंटस नै पंजाब किंग्स गी 21 रंजें कन्नै हराई दित्ता। एह् मैच कल रातीं लखनऊ दे अटल बिहारी वाजपेयी इकाना क्रिकेट स्टेडियम च खेड्डेआ गेआ। पंजाब किंग्स 200 रंजें दे लक्ष्य दा पिच्छा करदे होई 5 विकटें दे नुक्सान पर 178 रंज गै बनाई सकी। कप्तान शिखर धवन नै सब्बने शा मते 70 रंज जदके जॉनी बेयरस्टो नै 42 रंजें दी पारी खेड्डी।

लखनऊ जायंटस लेई मयंक यादव नै 3 विकट लैते। लखनऊ सुपर जायंटस नै टॉस जित्तिथै पैह्ले बल्लेबाजी दा फ़ैसला कीता ते 8 विकटें पर 199 रंज बनाए। क्विंटन कॉक नै सब्बने शा मते 54 रंज ते क्रुनाल पांडया नै 43 रंजें दा जोगदान दित्ता। पंजाब किंग्स दी तरफा सैम करन नै 3 विकआं लैतियां। मयंक यादव गी प्लेयर ऑफ द मैच घोषत कीता गेआ। आईपीएल च अज्ज दरुं मैच खेड्डे जांगन। पैह्ला मकाबला दपैहरी साढे 3 बजे शा अहमदाबाद दे नरेन्द्र मोदी स्टेडियम च गुजरात टाइटन्स ते सनराईजर्स हैदराबाद बश्कार होग। दुए मकाबले च संजा साढे 7 बजे विशाखापत्तनम दे वाई.एस.राजशेखर रेड्डी स्टेडियम च चेन्नई सुपर किंग्स ते दिल्ली कैपिटल्स बश्कार मैच खेड्डेआ जाग।

<><><><><><>